

Երթամք անիծենք քաղաքն որ լեղական ի մէջն կու բուսնի.
Պոյաճուն կարասն աւիրի, իւր սիրտըն թող հալի պատռի.
Պոյաճին այլ ի՛նչ անէ, իր տարտերն քանց ձերն աւելի:
Երթամ աղաչեմ զԱստուած որ լեղկան ընտիկն անցանի,
Ո՛չ սպիտակ ծոց լուրջ հագնի, ո՛չ մանկան սիրտըն նըւաղի:

Դ .

Կ'ասեմ թէ՛ Աղկեկ ես դուն, նա կ'ասէ թէ՛ Տէրն է տըւեր.
Ասցի թէ՛ Պագիկ մի տո՛ւր, ինքն ասաց՝ Պագըս գին ունի.
Ասցի թէ՛ Պագիդ գին ի՛նչ, նա ասաց՝ Պագիս գին, հոգի՛դ:
–Յոգեկս ալ հոգիդ ուզէ, չէ չասեմ, հանեմ տամ ի քեզ,
Վախեմ թա՛չերըս ուզես, հապ՝ ինչո՛վ հայիմ դեպ ի քեզ:
Աչեր եօթն ու վեց պիտեր, եօթն ու վեց կամ քառսուն ու վեց.
Մէկովն այլ աշխարհ հայիմ, այլն ամենն այլ ի դեպ ի քեզ:

Ե .

Երեսդ է սիրով մածուն, պագդ անուշ էր քանց ամենուն.
Բե՛ր պագնեմ լոյս երեսըդ, որ չերթաս գանգտիս քո ներում.
Քո ներդ ալ շատ վարձք արեր ու կապեր կարմունջ գետերուն.
Դուն այլ այդ վարձկունք արա՛, քո մէկիկ աղբօր արեւո՛ւն:

ԵՐԵՍՈՒՆԵԻՉՈՐՍԵՐՈՐԴ ՏԱՂԱՇԱՐՔ

Ա .

..... Եւ կարմիր խընձորով.
Ով անցաւ՝ տարաւ գոգով, ով ծոցով՝ թող երթայ բարով.
Ես անցայ ու մէկ տարայ. կանչեցին՝ Տարա՛ւ ճըղերով.
Նալա՛թըն աչերուդ վերայ, զիմ թարկիկն Է՛ր տըւիր շուտով:

Բ .

Գիշերս ի մօտ յիս արի՛, զիմ օթեւան քեզ ցուցանեմ.
Բանամ զիմ սըրտի կոճակն, ներս մըտնես՝ դառամ խփուցեմ:

Գ .

..... կուռըն մատաշ.
Կուգամ քո դըռնովն անցնիմ ու տանիմ գոտկունքս էլ ի քաշ.
Թող որ պագնեմ զքո երեսն, թող հազար թուր ի քաշ.
Հազար դարաւուլ ունիս, ես կուգամ կ'ելնեմ քեզ ֆըռաշ.